



## Terenga 5: Hōtaka 41 – ‘Kua tae ki te wā’

### He Mihi

Kua kūmorea ngā ihu o ō koutou waka ki te moana o Ako, kia toipoto ai te tere ngātahitanga ki tua o ngā pae tata, ki ngā pae kōkēi rā anō o Orotau.

### Hei Mahi Whakarongo

Ko te kaituhi o te pukapuka ‘Ngā Pēpeha a Ngā Tīpuna’ te kaikōrero i roto i te kiriata poto o te rā nei me ana whakamārama e pā ana ki tētehi whakataukī.

### Anei ngā pātai hei whakautu mā koutou:

- 1) Nā te aha te tupuna rā i mōhio ai tērā pea ka patua ia?
- 2) He aha i whakapuakina ai e ia te whakataukī?
- 3) Nō hea te tupuna rā?

Kia whakarongo tātou ki te tautōhito o Te Whare Wānanga o Awanuiārangī, ki a Hirini Moko Mead.

### He Whakamārama

Anei ētehi kīanga e pā ana ki te wā hei mātai mā tātou. Ko tēnei mea te wā, ehara i a tātou. Ka taka te wā, ka rere te wā i runga i tāna e pai ai. Kāore e taea e te tangata te whakaterere, te whakapōturi rānei te rere o te wā. I taea e Māui i ōna wā, engari kāore e taea e tātou i ēnei wā.

- Kua tae ki te wā / Kua tae te wā **X**
- Kua eke ki te wā / Kua eke te wā **X**
- Kei a koe te wā / Nōu te wā **X**
- Kei te aha te wā? / He aha te wā? **X**

### He Mahi Ī-papa

Whakamāoritīa ngā rerenga kei runga i te Īpapa:

It's time for us to go home

### Hei Mahi

Whakamāoritīa ēnei rerenga kōrero e pā ana ki te wā.

1. What's your time?
2. Time heals every wound.
3. Time's flying!
4. Do you remember the time we went skiing?
5. Time's up, people.

### Whakautu:

Mahi Īpapa: Kua tae ki te wā me hoki mātou ki te kāinga. / Kua tae ki te wā me huri te ihu o te waka ki te wā kāinga.

1. Kei te aha te wā i tō wati?
2. Mā te taka o te wā e mauru ai te pōuri o tō ngākau.
3. E rere ana te wā!
4. E mahara ana koe ki te wā i haere ai tātou ki te reti huka?
5. Kua pau te wā, e te iwi.